

亦非可守之地即今所恃只是南漢而已宜及此時預定依歸之地 上命議大臣○辛卯夜東方有氣如火光○諫院請還收李週量移之命以週曾以贓污被配故也 上不從○ 上以刑曹時囚多至七十餘名命趙速䟽決俾無滯獄之患○十一月朔壬辰以李元祿為大司憲朴鎮圭為獻納南宮為正言吳始萬為副修撰○御晝講 上見承旨具崙所著耳掩破落命賜貂掩○癸巳夜流星出井星下入巽方○宗簿寺判進璿源譜略賞提調以下有差○御晝講 上以榮川進士張胄男年七十八能出入場屋終至叅榜事甚稀貴命授相當職○甲午夜流星出天倉星下入南方又出北斗星下入艮方○引見大臣備局諸臣尹鑄復申屯田革罷之說許積吳始壽皆難之柳赫然曰壬辰亂後入烟蕭瑟故相臣柳成龍闢荒設屯只欲招集流散矣即今流民既集屯田如舊以弊言之宜在可罷而今若罷之則民散亦可慮矣 上亦以猝罷為不便 上命議定體府節目仍差出副察使許積曰金錫胄習於為將尹鑄時有不識世情處而大體通達他日為國家死者必此人也李元禎雖不猛亦通達有智此三人中可以擇定也 上命以錫胄為之鑄曰錫胄方為大司馬兼御營大將而今又兼體府事權太重矣 上變色曰大臣既舉卿名卿之此言